

20 SEPTEMBRIE RUGĂCIUNEA SOBORULUI SF. BRIANSKULUI

Молитва

О, всеблаженнии и богомудрии угодницы Божии, подвиги своими землю Брянскую освятившии и телеса своя, яко семена веры, в ней оставльшии, душами же своими Престолу Божию предстоящи и непрестанно о ней молящиися!

Се ныне, в день общаго вашего торжества, мы, грешнии, земнии сродницы ваши, дерзаем приносить вам сие хвалебное пение. Величаем ваша великия подвиги, духовнии воины Христови, терпением и мужеством до конца врага низложившии и нас от прелести и козней его избавляющии. Ублажаем ваше святое житие, светильницы божественнии, светом веры и добродетелей светящиися и наша умы и сердца богомудренно озаряющии. Прославляем ваша великая чудеса, цветы райстии, в стране нашей прекрасне процветшии и ароматы дарований и чудес повсюду благоухающии. Восхваляем вашу богоподражательную любовь, предстателие наши и покровителие, и, уповающе на помощь вашу, припадаем к вам и вопием: просветителие наши! Споспешествуйте людям Брянския земли завецанную вами веру Православную твердо содержать, да спасительное семя, вами всеянное, не изсушено будет зноем неверия, но, дождем благодати Божия напоенное, плод изобильный да принесет.

Святителие Христови! Молитвами вашими утвердите Церковь Русскую, ереси, расколы и нестроения в ней потребите, расточенныя овцы во едино соберите и от всяких волков, во одежди овчей в стадо Христово входящих, оградите.

Преподобнии отцы! Сохраните нас от прелестей мира сего лукаваго, да, отвергшеся себе и взявше крест свой,

последуем Христу, распинающе плоть свою со страстьми и похотьми, носяще тяготы друг друга.

Благовернии князие! Воззрите милостивно на земное Отечество ваше и вся нечестия и соблазны, в нем ныне сущия, оружием молитв ваших потребите, да, якоже древле, тако и ныне и в грядущее время, прославляется на святей земли нашей Имя Господне.

Страстотерпцы преславнии! Укрепите нас в мужественном стоянии даже до крове за веру Православную и обычаи отеческия, да ни скорбь, ни теснота, ни гонения, ни глад, ни нагота, ни беда, ни меч возмогут нас разлучити от любви Божия, яже о Христе Иисусе, Господе нашем.

Богомудрыя жены, в немощнем естестве подвиги велия явившия! Молитесь, да дух ваша любовь ко Господу и ревность о угождении Ему и о своем и ближняго спасении не оскудеет в нас.

Все святии сродницы наши, от лет древних просиявшии и в последние дни подвизавшиися, явленнии и неявленнии, ведомии и неведомии! Посетите нашу немощь и уничижение и молитвами вашими испросите у Христа Бога нашего, да и мы, безбедно преплывше пучину житейскую и невреديمо соблюдше сокровище Православных веры, пристанища вечнаго спасения достигнем и в блаженных обителях Горняго Отечества вкупе с вами и со всеми угодившими Ему от века святыми водворимся благодатию и человеколюбием Спасителя нашего Господа Иисуса Христа, Ему же со Превечным Отцем и Пресвятым Духом подобает непрестанное славословие и поклонение от всех верных во веки веков. **Аминь.**

[Текст утвержден Священным Синодом Русской Православной Церкви 9 июля 2019 года (журнал № 82)]